

中華書局 編

明雜史十六種
(三)

中華書局

中華書局 編

明雜史十六種
(二)

中華書局



第二册目錄

皇祖四大法十二卷(卷六—十)	一
卷六 治法	三
卷七 治法	八五
卷八 治法	二一
卷九 祀法	三二三
卷十 祀法	四六九

〔明〕何棟如輯

皇祖四大法十二卷

（卷六—十）



聖祖四大法卷六

江東臣何棟如謹輯

荆溪臣潘孔璧

同校

三阿臣陳克仕

治法

洪武十五年春正月辛巳朔 上命儒臣重製九奏侑食
樂章至是大宴始奏用之其一奏炎精開運之曲曰炎精
開運篤生 聖皇大明御極遠紹虞唐河清海晏物阜民
康威加夷獠德被戎羗八珍有薦九鼎馨香鼓鐘鐃宮
徵洋洋怡神養壽理陰順陽保茲遐福地久天長二奏

風之曲曰皇風被八表熙熙聲教宣時和景象明紫宸開
繡筵龍袞耀朝日金鑪裊祥烟濟濟公與侯被服麗且鮮
列坐視丹晨磬折在周旋羔豚升華俎玉饌充方圓初筵
奏南風繼歌賡載篇瑤觴欣載舉拜舞禮弗愆同樂及斯
辰於皇千萬年三奏眷皇明之曲曰赫赫上帝眷我皇
明太明繼集本固支榮厥本伊何育德春宮厥支伊何藩
那以寧慶延百世澤被羣生及時爲樂天祿是膺千秋萬
歲永觀厥成四奏天道傳之曲曰馬負圖今天道傳龜出
書兮人文宣義畫卦兮禹疇敘皇極建兮合自然綿綿曆
數歸明王祥麟在郊威鳳舞九夷入貢康衢謠聖子神

孫繩祖武垂拱無爲邁前古五奏振皇綱之曲曰周南詠
麟趾卷阿歌鳳凰霽霽稱多士爲楨振皇綱赫赫我大明
德尊踰漢唐百揆修庶績公輔理陰陽戡冠正襟珮都兪
在高堂坐令八紘內熙熙民樂康氣和風雨時田疇見豐
穰獻禮過三爵歡娛良未央六奏金陵之曲曰鍾山蟠蒼
龍石城踞金虎千年王氣都于今歸 聖主六代繁華經
幾秋江流東去無時休誰言天塹分南北英雄豈但嗤曹
劉我 皇昔住濠梁屋神遊天錫真人服手提三尺渡江
來詞臣早獻金陵曲歌金陵進珍饌諧八音繼三歎請觀
漢祖用兵時爲嘗馮異渾沱飯七奏長楊之曲曰長楊

綠黃鳥和鳴齒苜呈鮮紫燕輕盈千花浥露日麗風清及
時爲樂芳罇在庭管音嘒嘒絲韻泠泠玉振金聲各奏爾
能皤皤國老載勸載懲明德惟馨垂之聖經唐風示戒永
保嘉名無已大康哲人是聽八奏芳醴之曲曰夏王厭芳
醴商湯遠色聲聖人示深戒千春垂令名惟 皇登九五
玉食保尊榮日昃不遑餐布德緣羣生天庖具豐膳鼎鼐
事調烹豈但資肥甘亦足養遐齡達人悟茲理恒令五氣
平隨時知有節昭哉天道行九奏駕六龍之曲曰日麗中
天漏下遲公卿侍宴多令儀簫韶九奏觴九獻壺香細逐
祥風吹羣臣舞蹈 天顏喜歲熟民康長若此六龍廻駕

鳳樓深寶扇齊開扶玉几景星呈瑞慶雲多兩曜增輝匹
序和 聖人道大如天地歲歲年年奈樂何○丙戌命翰
林院侍講火原潔等編類華夷譯語 上以前元素無文
字發號施令但借高昌之書制爲蒙古字以通天下之言
至是乃命火原潔與編修馬沙亦黑等以華言譯其語凡
天文地理人事物類服食器用靡不具載復取元秘史叅
考紐切其字以諧其聲音既成詔刊行之自是使臣往復
朔漠皆能通達其情○庚戌命天下朝覲官各舉所知一
人 上諭之曰古之薦舉者以實不以名後世薦舉者徇
名而遺實故往往治不如古朕尊倣古制舉用賢才各

其器能而任使之庶幾求其實效今爾等來朝其各舉所知凡有一善可稱一才可錄者皆具實以聞朕將隨其才以擢用之母有所隱○是月延安侯唐勝宗右軍都督僉事張德以平衛處溫三府山寇人賜田一庄勅勝宗等曰古之爲將者其道有四曰智曰信曰勇曰仁智在算無遺策信在戰無後期勇以摧敵仁以撫下故能建立事功垂譽後世也邇者東浙山民嘯聚虐害民命爾等率師往討不逾五月而平之今賜爾田各一庄爲子孫世祿以酬爾功嗚呼成功不易保之尤難爾尚勉之

二月辛亥朔壬子 上以河南水災民饑命駙馬都尉李

祺往賑之勅諭祺曰河南奏黃河水決灇漫數百里漂蕩
民居百姓遷移不得寧處朕甚憫焉今東作方興民饑窘
不得耕作特命爾往賑之無使一夫一婦不獲其所爾其
欽哉祺承命而行復令齋勅諭布政司及府州縣曰大河
之水天泉也必有神以司之若所在牧守得人政務修舉
則其水蜿蜒東注無摧山裂石之患而民安焉苟非其人
則冲決城邑蕩析民居而牧守亦與其禍此感應之必然
也去歲河南來奏河水漂沒數州田園一空桑麻盡爲所
蕩良由牧守非人故耳方春東作將興民無衣食何以立
命今特命駙馬都尉李祺齎勅往所賑之處體念民艱

不足爲厚恩亦庶以少甦其困苦爾爲牧守者宜加修省以惠養其民無違朕命○甲寅以雲南平詔天下曰朕荷上天眷佑海嶽效靈祖宗積德自卽位以來十有五載寰宇全歸於版籍惟西南諸夷爲雲南梁王所惑恃其險遠弗遵聲教特命征南將軍潁川侯傅友德副將軍永昌侯藍玉西平侯沐英率甲士三十萬馬步並進征彼不庭大軍旣臨渠魁盡獲雲南已平詔告天下臣民共知於戲福民永已聖賢之爲逆天違命根禍殃民身家被罪惟西南諸夷應之故茲詔諭○乙卯置雲南布政使司改中慶路爲雲南府命汝南侯梅思祖平章潘原明署布政使司

事勅諭征南將軍潁川侯傅友德左副將軍永昌侯藍玉
右副將軍西平侯沐英曰雲南之地其民尚兵上古以爲
遐荒中古禹跡所至以別中土故屬梁州之域自漢隋唐
皆中國所統襲元旣立行省數出朝臣望重者鎮之今思
鎮彼非名臣望重者不能守也故特命汝南侯梅思祖平
章潘原明暫署雲南布政使司事事定之後除官代還
賜六部尚書侍郎馬敕曰禮君賜車馬所以禮重臣示優
寵也今尚書侍郎古六卿之職朝夕贊襄庶政非羣有司
比而騎乘不具其何以振肅禮儀使百寮具瞻哉書不云
乎明試以功車服以庸其各勵馬以稱吾優禮之意

○已未以通政使司試左通政張統爲雲南布政使司左
叅政儀鸞司大使宋昱爲右叅政通政使司左叅議韓鎰
爲左叅議試右通政范祖爲右叅議以勅諭統曰古者尚
忠之士必立身以行道道行則名成名成則貴身榮家以
顯親矣卿有志于古之士事朕左右能日省月察異於世
之昏愚汙濁者故特命卿以雲南方面之任正君子行道
之時也然雲南諸夷雜處威則易以怨寬則易以縱卿往
其務威德並行彼雖蠻夷豈不率服卿其敬哉將有無窮
之譽矣統旣陞辭 上復賦詩二章以賜之○壬申詔雲
南諸夷曰自有元失馭羣雄竝起各擅聲教廢興疊疊民

不聊生朕秣馬厲兵於江左控弦三十萬以觀諸雄久之
羣雄弗成乃命征虜大將軍平定元都肅清華夏莫安黎
庶邇年以來士不彎弧馬牧平野農安田畝人皆樂生惟
爾西南諸夷窳邇聲教恃險弗庭納逋逃匿有罪肆侮中
華凡我朝臣孰不憤恨是以特興問罪之師今雲南旣平
諸夷服從故詔諭以更生之恩於戲知天命者福臻昧天
理者禍至信如四時速如影響播告諸夷想宜知悉○巳
卯吏部奏引除縣官五十餘人 上悉詔前諭之曰縣官
之職最親於民古之稱循吏者多由此出苟有善政及民
而民稱之善名卽傳於遠邇也若蠹政害民而民怨之

聲亦不可拚也爲善爲惡朝廷公論有在爾等其慎之苟
治民有成績他日不患不至崇要也

閏二月辛巳朔甲午遣使詣雲南賜各土酋冠帶給以誥
勅使任本州知州等官仍諭征南將軍潁川侯傅友德等
曰初命將軍令各土酋入朝本欲使之知中國禮教今思
雲南新附人心未定卽令入朝諸蠻必生疑懼或遁入山
寨負險不服若復調兵損傷必多莫若順而撫之示以恩
信久則自當來朝矣

三月庚戌朔丁巳寧夏衛卒薛理言本衛軍士月鹽二斤
於小鹽池倉支給其地隔越黃河去寧夏三百餘里往還